

# Bakti siswa di Kampung Lok Nunuk

Oleh Johary Indan

bhvarsiti@bharian.com.my

BH 01-05-2012 08:09

**TUARAN:** Perkampungan nelayan Lok Nunuk, kira-kira 50 kilometer dari sini, terus menggamit kedatangan pengunjung luar terutama penuntut institusi pengajian tinggi (IPT) awam dan swasta untuk melaksanakan program amal bakti kepada penduduk setempat.

Terbaru, seramai 90 pelajar daripada Universiti Sultan Zainal Abidin (USZA), Universiti Malaysia Sabah (UMS) dan Universiti Teknologi MARA (UiTM) Sabah, mengendalikan Program Bakti Siswa selama empat hari dan tiga malam di perkampungan masyarakat Bajau itu.

Pengarah program itu, Nik Zawawi Ismail, berkata pemilihan Kampung Lok Nunuk sebagai lokasi kegiatan itu berdasarkan beberapa ciri, termasuk keunikan budaya dan adat resam masyarakat yang bermastautin di situ.

"Selain Kampung Lok Nunuk, dua kampung lain yang menjadi perhatian pelajar IPT di daerah ini ialah Kampung



HAJIJI menerima cenderamata daripada penganjur program Bakti Siswa.

Serusop dan Kampung Penimbawan.

"Bagaimanapun, memandangkan Kampung Lok Nunuk memenuhi ciri dikehendaki penganjur, kami mengambil keputusan berkampung di situ," katanya dalam Program Bakti Siswa Masih Ada Yang Prihatin, di kampung itu, baru-baru ini.

Majlis penutup disempurnakan oleh Menteri Kerajaan Tempatan dan Peru-

mahan Sabah, Datuk Hajiji Mohd Noor. Program yang julung kali diadakan di Sabah itu membabitkan 32 keluarga angkat.

Nik Zawawi berkata, selama di kampung itu, banyak perkara baru dipelajari pelajar IPT terbabit, terutama mengenali adat dan kebudayaan, termasuk belajar bahasa Bajau daripada keluarga angkat mereka.

"Antara kegiatan yang kami lakukan ialah mengendalikan gotong royong bersama-sama penduduk membersihkan kawasan masjid dan Kampung Lok Nunuk, membina parit dan bersukan," katanya.

Sementara itu, Hajiji yang juga Ahli Dewan Undangan Negeri (ADUN) Sulaman, bangga kerana Kampung Lok Nunuk dipilih penganjur program itu sebagai lokasi pengendalian Bakti Siswa berkenaan.

Beliau yakin banyak perkara baru diperoleh pengendali dan pelajar IPT sepanjang berada di kampung itu, terutama mempelajari adat dan kebudayaan, termasuk bahasa masyarakat Bajau.

Sehubungan itu, katanya, usaha itu secara tidak langsung membantu pelajar IPT menjalankan kajian mengenai budaya, adat dan bahasa Bajau, etnik terbesar di Sabah.

Hajiji turut mengingatkan pelajar IPT tidak terbabit gerakan menentang pemimpin dan kerajaan, kerana perbuatan itu boleh menjejaskan masa depan mereka.